



Inatsisartunut ilaasortaq,
Emanuel Nûko, Naleraq

§ 37 naapertorlugu apeqqummut nr. 032-mut qilalukkanut tunngasumut akissuteqaat

Ulloq: 19-05-2021
Suliap normua: 2021 - 9329
All. nr. 16759149

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanoq.gl
www.naalakkersuisut.gl

Inatsisartut suleriaasianni § 37, imm. 1 naapertorlugu qoorortuunik tuukkartalinnik qilalugarniarneq pillugu Naalakkersuisunut apeqquteqarsimavutit. Apeqqutit uanga suliassa qarfigisannit akineqartussanngorlugu innersuunneqarpoq.

- 1. Aallaasit tuukkartallit akuerisaappat qaqortanik qernertanillu qilalugarniarnermi atussallugit?*

Sakkut pillugit Kalaallit Nunaannut inatsit nr. 1008, 19. december 1992-imeersumi § 1 naapertorlugu Kalaallit Nunaanni politimesterimik akuerineqarsimannngikkaanni aallaasit imassallu aalajangersimasut eqqunnissaat, sananissaat, pigilernissaat, tigumminissaat, nassatarinissaat atornissaalluunniit inerteqqutaavoq. Aallaat tuukkartalik sakkut pillugit inatsimmi allassimangilaq, taamaattumillu Kalaallit Nunaanni inerteqqutaasutut isigineqassalluni.

Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 3, 27. januar 2017-imeersumi § 12 naapertorlugu, qilalukkanik qaqortanik qernertanillu piniarnermi kaliberit inerteqqutaanngitsut minnerpaamik .30-06 (7,62x63 mm)-t atorneqassapput. Qoorortuunik eqittaannartakkanik atuineq inuussutissarsiuutigalugu piniarnermut allagartalinnut ajornartitaanngilaq. Taanna aalajangersagaq aallaasinik tuukkartalinnik atuinissamut akuersissutitaqanngilaq.

§ 12 imm. 2-mi allassimavortaaq, ajornartinnagu qilalugaq qaqorta qernertarlunniit nangillugu toqussutissaanik aallaaneqartinnagu naalillugu annaanaveerneqassasoq. Maani tuukkaq assaannarmik naalittagaq pineqarpoq. Aallaaseq tuukkartalik pineqartoq Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi imaluunniit Sakkut pillugit Kalaallit Nunaannut inatsit 19. december 1992-imeersumi allassimangilaq.

Siuliani allassimasut ima paasineqassapput aallaat tuukkartalik Kalaallit Nunaanni inerteqqutaasoq.

- 2. Kalaallit Nunatsinni aallaasit tuukkartallit atorsinnaaneri Naalakkersuisut qanoq isumaqarfigaat qilalukkanut qaqortanut qernertanullu tunngatillugu?*


Naalakkersuisut qilalukkanik qaqortanik qernertanillu piniarnermi aallaasinik tuukkartalinnik atuineq pillugu maannarpiaq isummersimangillat.

- 3. Aallaasit tuukkartallit nunatsinni atornissaat tulluuppat?*

Naalackersuisoqarfiup ilisimavaa aallaat tuukkartalík arfernut mikinernut atorneqartarnikuusoq, kisiannili sakkut pillugit inatsisip 1992-imeersup atuutilerana sioqqullugu. Qoorortuup tuukkartallip taamani atorneqartarnerata pitsaassusaa pillugu paasissutissat Naalackersuisoqarfiup ilisimangilai. Taamaattumik APN-imit nalileruminaatsinneqarpoq sakkoq nunatsinnut tulluartuunersoq.

Aqutsinermut kattuffiit assigiinngitsut soorlu Arfanniarneq pillugu nunat tamalaat ataatsimiititaliarsuat (IWC), Atlantikup avannaani immami miluumasut pillugit ataatsimiititaliap (NAMMCO) kiisalu qilalukkat qaqortat qilalukkallu qernertat pillugit ataatsimut ataatsimiititaliap (JCNB) pisatigut annaasat ikilisarniarlugit piumasaaqateqarput, pissutigalugu pisatigut annaasat ajornartorsiutitut annertuutut isigimmassuk. 2000-kkunni APN sakkut pillugit immikkut ilisimasalimmut attaveqarpoq paasiniarlugu aallaat tuukkartalinnut tunngasunik ilisimasaqarnersoq, akuersivorlu, ilisimatitsissutigaaali aallaasit tuukkartallit sanaartorneqarunnaarsimasut aallaasiliorfíllu pineqartoq taamaattunik sanaqqinnissamut pilersaaruteqanngitsoq. Aallaat tuukkartalík imaani annaassiniaanermut imaluunniit angallat nunamut sissiuqaqanngitsumut pitunnissaanut atatillugu kapputsitsilluni pituutissatut atorneqartarsimavoq. Taamaattumik aallaaseq tuukkartalík aallaqqaammulli uumasunik toqutsinissamut sananeqarsimangilaq.

Inussiarnersumik inuulluaqqustillunga



Aqqaluq B. Egede

Aalisarnermut Piniarnermullu Naalackersuisoq